

Debatta davart las prioritads politics

Cussegl grond ha discutà da finanzas e planisaziun da territori

DA REST GIACUN DERMONT / ANR

■ **Il davos di da la sessiun d'avrigl ha il cussegl grond tractà differentas dumondas ed incumbensas. Da las finanzas a la planisaziun da territori ha il parlament discutà fatschentas politics futuras.** En vista al pegiurament prognostigà da las finanzas chantunales dattan quellas per il mument regularmain da discurren en il parlament. In ulteriur tema che vegn debattà actualmain a moda contraversa è la planisaziun dal territori cun tut ses aspects.

Cura è il mument adattà per intervegnir?

Il deputà *Rudolf Kunz* (pld, Cuira) ha inoltrà per mauns da la regenza in'incumbensa concernent l'examinaziun da las incumbensas e da las prestaziuns dal chantun Grischun. A quella è vegnida messa en confrunt la risposta e la proposta d'agir da la regenza. La differenza da l'oriunda incumbensa Kunz e da la cuntraproposta da la regenza n'è betg sa mussada en il cuntegn, mabain sulettain en l'orizont da temp. Las 44 deputadas e deputads che han sutscrit l'incumbensa Kunz èn da l'opiniun che la regenza duaja entschaiver immediatmain a reducir las prestaziuns. «Enstagl da spetgar enfin che nus avain in deficit en il quint chantunal stuain nus agir ussa», ha argumentà Kunz. Sustegn ha el survegnì da sia Partida liberal-democratica, da la pps e dals verd-

berals. «Jau hai il sentiment ch'il chantun Grischun conservia structures enstagl da stgaffir spazi per avoir la libertad d'agir cur che quai daventa necessari», ha ditg *Jürg Kappler* (pvl, Cuira)

La regenza vul observar il svilup

Ina gronda part da las entradas dal chantun Grischun na vegn betg generada sez, mabain vegn da contribuziuns da terzs, cunzunt da Berna. Per quest motiv èsi grev da calcular l'import da las entradas ils proxims onns. «Tut tenor las decisions da la confederaziun stuain nus intervegnir pli ferm u pli pauc», ha declerà cussegliera guvernativa *Barbara Janom Steiner*, la manadra dal departament da finanzas. Perquai na vul ella betg stuaire cumenzar gia ussa cun mesiras da spargn, mabain spetgar ed observar il svilup da las entradas. La regenza ha chattà sustegn tar las fracziuns da la pcd, la pbd e la ps. «Er nus vesain la necessitad d'agir en quest sector», ha ditg *Gian Michael* (pbd, Val Schons), «cun la regulaziun da finanzas avain nus dentant gia in instrument pratitgabell.» Quella regulaziun entra en vigur sch'il chantun scriva cifras cotschnas en il resultat operativ e quinta ils onns suandants cun deficits structurals. «Quai pudess esser il cas l'onn 2017», ha ditg *Janom Steiner*, «tant ch'in program da spargn daventa forsa mes relasch politic.» *Janom Steiner* è dapi l'on

2008 en la regenza. Cun la fin da la legislatura l'onn 2018 vegn ella a sortir da la regenza causa la limitaziun dal temp d'uffizi. Ina maioritad da 71 cunter 46 deputads è suandada quest'argumentaziun ed inoltrà l'incumbensa en il senn da la regenza cun 100 cunter 14 vuschs tar trais abstenziuns.

Debatta davart la planisaziun dal territori

Revisiuns da la planisaziun dal territori tutgan en ils ultims onns bunamain tar il mintgadi politic en Svizra ed en il Grischun. Il mars 2013 è la revisiun parziala da la lescha davart la planisaziun dal territori vegnida acceptada dal pievel. Novas enzonaziuns n'èn dapi lura betg pli pussaivlas sche la quota d'occupaziun da las zonas existentas sutpassa 95 pertschient. Deputà *Marcus Caduff* (pcd, Lumnezia) ha vulì savair da la regenza co ch'ella prevesia d'agir en connex cun zonas da bajegiar. La regenza ha constatà che las reservas da zonas da bajegiar na sa chattian betg là nua ch'il potenzial da svilup saja grond. La dumonda da deputà *Retto Cramer* (pcd, Belfort) pertutgand l'utilisaziun dad edificis ordaifer la zona da construcziun, per exempel stallas ed aclas, ha provotgà ina discussiun contraversa. Il cussegl grond surdat a la regenza l'incumbensa d'inoltrar in'iniziativa dal chantun a Berna cun 86 cunter 24 vuschs tar duas abstenziuns.